

<https://news.usm.my>

Berita Mutakhir

01

APR

YURAN IPTA KEKAL

31 Mac 2015 - Yuran pengajian dan penginapan di semua 20 Institusi Pengajian Tinggi Awam (IPTA) di negara ini tidak akan dinaikkan sewenang-wenangnya sejurus selepas pelaksanaan cukai barang dan perkhidmatan (GST).

Perkhidmatan Berita Nasional Malaysia (Bernama) hari ini memetik jaminan yang diberikan oleh Pengerusi Jawatankuasa Naib Canselor dan Rektor (JKNC/R) IPTA, Brig Jen Datuk Profesor Dr. Kamarudin Hussin tentang hal ini yang turut menjelaskan bahawa penyebaran maklumat tentang kenaikan yuran pengajian dan penginapan adalah tidak benar dan hanya untuk mewujudkan situasi panik dalam kalangan mahasiswa.

Beliau menyeru semua mahasiswa agar tidak mudah terpengaruh dengan penyebaran maklumat yang tidak sahih seperti ini sebaliknya perlu merujuk kepada pejabat hal ehwal pelajar dan kewangan universiti masing-masing terlebih dahulu.

Menurut Kamarudin lagi, kenaikan kos yuran berkenaan juga adalah tidak logik memandangkan pelajar telah berada di pertengahan semester dengan yuran pengajian dan penginapan telah pun ditolak daripada pinjaman atau biasiswa pelajar.

Beliau berkata kerajaan telah menyatakan dengan jelas bahawa semua program akademik yang diiktiraf oleh Agensi Kelayakan Malaysia (MQA) serta kesemua perkara yang terbabit secara langsung dengan aktiviti pengajaran pembelajaran tidak akan dikenakan GST.

"Memandangkan hampir kesemua program akademik yang ditawarkan di universiti diiktiraf MQA, maka GST tidak akan dikenakan ke atas yuran, serta perkara lain yang berkenaan secara langsung dengan penawaran program-program ini.

"Sebagai contoh, program pengajian berstatus eksekutif khususnya yang ditawarkan kepada pelajar pasca siswazah terpaksa dinaikkan memandangkan penawaran kursus tersebut adalah bermotifkan keuntungan, manakala bagi yuran penginapan pula, sewaan penginapan di luar semester pengajian terutama daripada pihak luar akan turut dikenakan CBP," kata beliau seperti laporan Bernama itu lagi.

Share This

Pusat Media dan Perhubungan Awam / Media and Public Relations Centre

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : pro@usm.my (<mailto:pro@usm.my>)

Laman Web Rasmi / Official Website : [Universiti Sains Malaysia](http://www.usm.my) (<http://www.usm.my>)

[Client Feedback / Comments](http://web.usm.my/smbp/maklumbalas.asp) (<http://web.usm.my/smbp/maklumbalas.asp>) | USM News Portal. Hakcipta Terpelihara USM 2015